

ex hæreticis plurimi venerantur, nedum sapientes, Catholiceque Doctores.

Successor Chrysoftomi in Episcopatu Proclus Oratio-
ne 6. in Deiparam de Josepho loquens Virginem sponsam,
quod uterum ferret, demirante, sic ait: *Non meminerat,
potuisse eam effici Dei templum, quæ ex mundo erat formata
luto.* Adjectivum Græcum est *ἀγαθόν*, quod etiam *bonum,
justumque* significat. Hic non animæ solum, sed carnis ma-
culam negat umquam fuisse in Sanctissima Virgine. S. Sa-
bas, qui fuit auctor sæculi quinti, sententiam similem ha-
bet in Ode de S. Malachia, ubi Deiparam sic alloquitur:
*Tu macularum semper omnium expertis, ligno vitæ simillima,
non alium nobis fructum germinasti, quam Christum.* Nec
minus est luculentum Andreae Cretensis testimonium in En-
comiõ Nativitatis Mariæ: *Primitiæ naturæ nostræ, quæ ex
tota conspersione nihil inquinamenti suscepit.* Joannes Da-
mascenus in Oratione prima de Natali Virginis Conceptionem
innoxiam his verbis declarat: *Naturæ gratiam antever-
tere causa non est.* Quibus verbis aperte significat, Deiparam
Virginem non ante naturam accepisse, quam gratiam. Idem
Damasceus in Menæis Ode de S. Anathasio: *O semper, &
ubique inculpatissima Numinis Mater, quæ es ingens cantan-
di materia Apostolis, & Martyribus.* In iisdem Menæis Ho-
milis de Annuntiatione hæc leguntur: *Primo quidem singu-
lari providentia perfecit (Deus) ut sacra Virgo ab ipso vitæ
suae principio tam existeret pura, quam esse puram decebat il-
lam, quæ tanto bono, idest Christo digna existeret.* Habemus
igitur testimonium Ecclesiæ Græcæ universæ, quæ primum
illud Conceptionis momentum, quo Dei Mater vivere cœ-
pit, purum esse faterur, interque laudes Divinas quotannis
celebrat. Singularem hanc laudem Deiparæ Virginis com-
plexus est brevi carmine Joannes Geometra in hymno 3. ex
Theotociis; ubi Maria salutatur hoc modo:

Vitii nostri crimine Virgo carens.

Et apertius in illo: